



ՀԱՍՐԱԹՅԱՆ
ՄԻՆԱՍՅԱՆ
ՀԻՄՆԱԴՐԱՄ



Bookmark

ՕՊԵՐԱՑԻԱ «ԶՈՂ»

Bookmarket

ՄԻՆԱՍՅԱՆ  ՄԱՏԵՆԱՇԱՐ

Ավետիս Գրիգորյան, Արսեն Բորիսյան

ՕՊԵՐԱՑԻԱ «ԶՈՂ»

Ինչպես Հայաստանը 1919-ին պահեց Սոթքի բնագիծը



ԵՐԵՎԱՆ
2022

ՀՏԴ 93/94
ԳՄԴ 63.3
Գ 888

Գրիգորյան Ավետիս, Բորիսյան Արսեն
Գ 888 Օպերացիա «Զոդ». Ինչպես Հայաստանը 1919-ին պահեց Սոթքի
բնագիծը/ Ա. Գրիգորյան, Ա. Բորիսյան.- Եր.: Newmag, 2022.- 404 էջ.-
(«Մինասյան» մատենաշար):

Ադրբեջանը չի թաքցնում իր տարածքային հավակնությունները Հայաստանի Գեղարքունիքի մարզի սահմանային շրջանների նկատմամբ: Այս աշխատությունը ցույց է տալիս, որ Բաքվի նկրտումները նոր չեն, առնվազն 100 տարվա պատմություն ունեն: 1919 թվականին Սոթքի շրջանի թաթարական բնակչությունն Ադրբեջանի դրդմամբ ապստամբում է Հայաստանի իշխանության դեմ և հայտարարում Ադրբեջանին միանալու մասին: Եվ միայն «Զոդ» օպերացիայի շնորհիվ է այս կարևորագույն շրջանը մնում Հայաստանի կազմում:

«Զոդ» օպերացիան գրեթե անհայտ է լայն հասարակությանը, մինչդեռ այն վերջին հարյուրամյակի մեր պատմության ամենափայլուն էջերից է: Գրքի հեղինակներն առաջին անգամ և նոր փաստական տվյալների հիման վրա ներկայացնում են Սևանա լճի տարածաշրջանում հայ-թաթարական բախումների պատճառները, ժամանակագրությունը, հետևանքները:

Համակողմանիորեն քննարկելով Վարդենիսի հերոսական ինքնապաշտպանության և «Զոդ» օպերացիայի ռազմաքաղաքական ու պատմամշակութային նշանակությունը՝ հեղինակներն իրականացրել են միջգիտակարգային հետազոտություն, օգտագործել ոչ միայն պատմական-արխիվային, այլև հնագիտական ու բանագիտական տվյալներ: Նրանք հատուկ այս գրքի համար հնագիտական պեղումներ են իրականացրել Գեղարքունիքի մարզում, հավաքել են ականատեսների ու նրանց ժառանգների վկայությունները և այդ դեպքերին առնչվող ժողովրդական երգերը:

Գրքի հարցադրումները չափազանց արդիական են հենց այսօր: Այդ պատճառով գիրքը նախատեսված է ոչ միայն նեղ մասնագիտական, այլև քաղաքականությամբ, պատմությամբ ու մշակույթով հետաքրքրվող ընթերցողների համար:

ՀՏԴ 93/94
ԳՄԴ 63.3

ISBN 978-9939-884-47-9

Գիրքը հրատարակության է երաշխավորել ՀՀ ԳԱԱ հնագիտության և ազգագրության ինստիտուտի գիտական խորհուրդը:

Ավետիս Գրիգորյան, Արսեն Բորիսյան, Օպերացիա «Զոդ». ինչպես Հայաստանը 1919-ին պահեց Սոթքի բնագիծը, © 2022, «Նյու Մեգ» ՍՊԸ

Այս գրքի հայերեն հրատարակության բոլոր իրավունքները պատկանում են «Նյու Մեգ» ՍՊԸ-ին և «Հասրաթյան-Մինասյան» հիմնադրամին:



ՀԱՍՐԱԹՅԱՆ
ՄԻՆԱՍՅԱՆ
ՀԻՄՆԱԴՐԱՄ

Գիրքը հրատարակվել է «Հասրաթյան-Մինասյան» հիմնադրամի «Վերախմաստավորելով 20-րդ դարի հայոց պատմությունը» պատմագիտական դրամաշնորհով:

«Հասրաթյան-Մինասյան» հիմնադրամը ստեղծվել է 2018 թվականի փետրվարին՝ անվանի ճարտարապետ, պետական և հասարակական գործիչ Գրիգոր Հասրաթյանի և անվանի գիտնական, քաղաքագետ, պետական գործիչ Միքայել Մինասյանի հիշատակին:

Հիմնադրամի «Մինասյան» մատենաշարն աջակցում է պատմագիտական, հետազոտական նախագծերին, որոնք հնարավորություն են տալիս վերախմաստավորել 20-րդ դարի Հայաստանի պատմությունը:

Բովանդակություն

Ներածություն	13
Մաս I Սոթքյան հանգույցի կարևորությունը	21
Գլուխ 1 Սոթքի վարչական սահմանները որոշվում են աշխարհագրորեն	23
Գլուխ 2 Ուշկիանիից մինչև Գեղարքունիք. Սոթքը՝ քարտեզներում ու բաժանումներում	29
Գլուխ 3 Սոթքը հայաթափվեց, բայց դարձավ մարդաշատ.....	41
Մաս II Հակամարտությունը Սոթքում	53
Գլուխ 4 Ոսկին ու արոտավայրը՝ հակամարտության և համակեցության պատճառ հնագույն շրջանում.....	55
Գլուխ 5 Միջնադարյան սիրավեպ-էպոսները նվաճողների մասին	63
Գլուխ 6 Նոր ժամանակներ, նոր հակամարտություններ. հայ-մահմեդական բախումները.....	73
Մաս III «Զող» օպերացիան	89
Գլուխ 7 Սիլիկյան եղբայրներն ու «զողյան դավադրությունը»	91
Գլուխ 8 «Զող» օպերացիան և հայ-թաթարական լարվածության հանգուցալուծումը	133

Գլուխ 9	Լրտեսական ցանցը Երևանում և ադրբեջանական ռևանշի փորձը	145
Գլուխ 10	«Հայկական նավատորմի» ստեղծումը.....	159
Գլուխ 11	Ադրբեջանական տեսակետը.....	165
Մաս IV	«Զոդ» օպերացիան մեր օրերում. ինչ և ում են հիշում	173
Գլուխ 12	«Զոդ» օպերացիան բանավոր զրույցներում և հուշապատումներում.....	175
Մաս V	«Զոդ» օպերացիայի հնագիտական ապացույցները	219
Գլուխ 13	Որտեղ է Սիլիկյան եղբայրների գերեզմանը.....	221
Վերջաբան	229
Երախտագիտության խոսք	239
Ծանոթագրություններ	241
Աղբյուրների և գրականության ցանկ	275
Արխիվային փաստաթղթերի ցանկ	297
Նկարների աղբյուրներ	341
Տեղանունների նույնականացման ցանկ	347
Տեղանունների, անձնանունների և առարկաների ցանկ	355

«Սեւանը բխում է հեռւից, հսկայական մի խորքից, այնտեղ լեռների տակ պառկած դասաւոր շերտերի տակից, իբրեւ մեծղի այս աշխարհի անզուսպ մի բացւածք, լոյսը տենչող մի գաղտնի ուժ եւ մթին մի կեանքի դէպի արեւ բացւած մի պատուհան:

Հայաստանի որոշ վայրերը ու մանաւանդ Սեւանը հասկանալու համար պէտք է գտնել խորհուրդների բանալին:

Հայաստանի բանալին թաքնւած է հազար շերտերի տակ, բայց ով որ գտնի՝ կարող է բոլոր դռները բանալ: Արեւմուտքի եւ Արեւելքի: Այստեղ է բանալին ամենայն բանի:

Սեւանը մօտ է բոլոր աշխարհներին, որովհետեւ նա բարձրաբարձր հոգեկան կայան է, որտեղ կուտակւում են հիւսիսից եւ հարաւից, վերից եւ վարից եկող բոլոր հոսանքները, եւ որտեղից աննշմարելի հոգեկան հոսանքներ են անցնում դէպի աշխարհիս ճակատագիրը կանոնաւորող վայրերը»:

Կոստան Զարեան, «Անցորդը եւ իր ճամբան»

Ներածություն

Այս գրքում առաջին անգամ ներկայացնելու ենք ակադեմիական շրջանակներին ու հասարակությանը քիչ հայտնի՝ 1919 թվականի «Զող» օպերացիան: Առաջին Հանրապետության գոյության՝ տնտեսական և ռազմաքաղաքական առումներով ծանր ժամանակաշրջանում Թուրքիան և Ադրբեջանը ռազմական ագրեսիային զուգահեռ իրականացնում էին Հայաստանը ներսից քայքայելու ծրագիր՝ որպես գործիք կիրառելով թուրքախոս բնակչությանը ստվար բնակեցված շրջանները: Այդ բնակչությունը հիմնականում կենտրոնացած էր սահմանամերձ գոտիներում և դարձել էր յուրահատուկ պայթուցիկ լիցքերի կրողը:

Հակապետական շարժումների կենտրոններից մեկը Նոր Բայազետի գավառի Բասարգեչարի* շրջանն էր՝ այժմյան ՀՀ Գեղարքունիքի մարզի հարավարևելյան հատվածը: Թուրքաթաթարական խռովությունները զանգվածային դարձան 1918-ի սկզբին, Արևելյան Հայաստան թուրքական արշավանքին զուգահեռ: Չանսալով Հայաստանի իշխանության բազմաթիվ հորդորներին՝ շրջանի թուրքաբնակ գյուղերն անցան զինված ապստամբության՝ հարձակվելով սակավաթիվ հայկական բնակավայրերի վրա:

* «Բասարգեչար» անունը ծագում է թուրքերեն «բասար» (հարձակվել, տրորել) և «գեչար» (անցնել) բառերից: Միջնադարյան հայկական աղբյուրներում այն հիշատակվում է որպես Վասակաշեն գյուղ Սյունյաց աշխարհի Սոթք գավառում: (Ծանոթագրությունները՝ հեղինակների):

Բախումներն ուղեկցվում էին խաղաղ բնակչության սպանություններով, մարդկանց ունեզրկումով: Շրջանը փաստացի դուրս եկավ պետական վերահսկողությունից, հաստատվեց անիշխանություն: Ապստամբության կենտրոն դարձնելով Զոդ գյուղը՝ մուսուլման առաջնորդները տարածաշրջանը հայտարարեցին Ադրբեջանի մաս: Այս գրքում կպատմենք Բասարգեչարի «40 օրվա» հերոսական կռիվների, Սիլիկյան եղբայրների դեմ հրեշավոր դավադրության և Հայաստանի Առաջին Հանրապետության ոստիկանական ամենամեծ օպերացիայի մասին:

Այս գիրքը բացառիկ է, որովհետև մինչև այսօր ո՛չ հայկական, ո՛չ ադրբեջանական պատմագիտությունն այս թեմային առանձին չի անդրադարձել: Պատմաբան Համլետ Հարությունյանը¹ ժամանակին գրել է «Զոդ» օպերացիայի մասին, բայց հպանցիկ և ներկայացնելով որպես Սևանի ավազանի 19-20-րդ դարերի պատմության մի մաս: Պատմաբան Վանիկ Վիրաբյանը² «Զոդ» օպերացիայի մասին խոսել է ՀՀ զինված ուժերի ու հատուկ ծառայությունների պատմության համատեքստում: Ազգագրագետ Ռոզա Գրիգորյանը «Զոդ» օպերացիան հիշատակում է բանասացների պատմություններում և երգերում³:

Ադրբեջանցի պատմաբանների աշխատանքը կառուցված է գլխավորապես բանավոր հիշողությունների վրա: Այդ է պատճառը, որ դրանք ունեն բազմաթիվ փաստական անճշտություններ և ցածր հավաստիություն. ընդամենը հակիրճ անդրադարձ են և աչքի են ընկնում փաստերի միակողմանի մեկնություններով⁴:

Մինչդեռ մեր ուսումնասիրության արդյունքում հայտնաբերվել են «Զոդ» օպերացիայի, Սոթքի տարածաշրջանում հայ-

թաթարական բախումների և զոդյան դավադրության մանրամասների նոր, փաստական տվյալներ: Օգտագործել ենք ոչ միայն պատմական, այլև բանագիտական ու հնագիտական սկզբնաղբյուրներ, ստեղծել փաստական տվյալների շտեմարան: Վերակազմել ենք մարտական գործողությունների աշխարհագրությունը, փաստագրել և քարտեզագրել բախումների վայրերն ու զորքերի տեղաշարժերի ուղղությունները:

Այս ուսումնասիրության շրջանակում պեղումներ ենք կատարել Սոթք գյուղի կենտրոնում գտնվող «Տիգրանաբերդ» բլրի վրա (մասնագիտական գրականության մեջ հայտնի է Սոթք 1 անունով), որտեղ պահպանվել են վաղմիջնադարյան ամրոցի և միջնադարյան հայկական գերեզմանատան հետքեր: Պեղումներով բացվել է եղբայրական գերեզման: Մեր նախնական ենթադրությամբ՝ այստեղ են թաղված «Զոդյան դավադրության» ժամանակ սպանված հայ հերոսները:

Այս հետազոտությունը պատմագիտության, ռազմական և ֆորենսիկ հնագիտության սահմանագծին է: Ռազմական հնագիտությանը բնորոշ է վերջին 200 տարվա պատերազմական գործողությունների հետազոտությունը, ֆորենսիկ հնագիտությանը՝ զանգվածային թաղումների ուսումնասիրությունը⁵:

Գրքի աշխատանքային նախնական վերնագիրն էր «Զուռնա և դիոլ»: Մինչև «Զոդ» օպերացիայի հանգուցալուծումը ՀՀ զինված ուժերը զուռնա-դիոլի նվազակցությամբ էին մոտենում թուրքական բնակավայրերին՝ խաղաղություն առաջարկելով, և գնդակոծվելուց հետո միայն պատասխանում էին կրակով: Հայկական բանակը երաժշտությունն առաջարկում էր որպես հակամարտության լուծման ձև: